



N°645  
Entrée le 23.04.2024  
Chambre des Députés  
Déclarée recevable  
Président de la Chambre des Députés  
(s.) Claude Wiseler  
Luxembourg, le 24.04.2024  
Chambre des Députés

Claude WISELER  
President vun der  
Chamber vun den Deputéierten  
19, um Krautmaart  
L-1728 Lëtzebuerg

Lëtzebuerg, den 23/04/2024

Här President,

**Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un de Premierminister an d'Ministere fir Finanzen, Verdedegung, Wirtschaft & Aussenugeleeënheeten weiderzeleeden.**

Wéi d'Lëtzebuenger Land a senger Editioun vum 19.04.2024 mell, stoung bei der Staatsvisitt vun der groussherzoglecher Koppel an de Vertrieder vun der lëtzebuenger Regierung um Mëttwoch och eng Visitt vun der Firma Jan De Nul Group um Programm. Den Ex-Wirtschaftsminister Etienne Schneider ass hei Member am Verwaltungsrot.

An deem Zesummenhang wéilt ech de Ministeren dës Froe stellen:

1. Firwat ass dës Firma während der Staatsvisitt besicht ginn?
2. Wéi eng aner Firmen si während der Visitt an der Belsch besicht ginn?
3. Hält d'Regierung et net fir onpassend, eng Firma vun engem Ex-Minister besichen ze goen, bei deem no sengem Austrëtt aus der Politik kloer ginn ass, datt en op Staatskäschten ee luxuriéist Liewe gefouert huet (<https://www.reporter.lu/luxemburg-minister-auf-reisen-die-spesen-bilanz-von-blau-rot-gruen/>) an ënner dem senger Verantwortung de LUXEOSys Satelite-Projet finanziell all Kader gesprengt huet?
4. Wat fir eng Kooperatioun gëtt et tëscht dem Lëtzebuenger Staat an der genannter Firma?

Mat déiwem Respekt,

GOERGEN Marc  
Deputéierten



[www.piraten.lu](http://www.piraten.lu)



LE GOUVERNEMENT  
DU GRAND-DUCHÉ DE LUXEMBOURG  
Ministère d'État

**Äntwert vum Premierminister, vum Finanzminister, vun der Verdeedegungsministesch, vum Minister fir Wirtschaft, PME, Energie an Tourismus a vum Minister fir auswäerteg Ugeleeënheeten an Aussenhandel op d'parlamentaresch Fro n° 645 vum 23. Abrëll 2024 vum honorabelen Deputéierte Marc Goergen.**

### **Ad 1)**

D'Staatsvisitt stoung ënnert Anerem am Zeeche vun der Zesummenaarbecht am wirtschaftleche Beräich, mat engem Fokus op der Nohaltegkeet. D'Visitte vum Nordseehafen a bei Jan de Nul hunn sech an de Kader vum Wirtschaftsprogramm vum maritimme Secteur op der Staatsvisitt ageschriwwen deen als Zil hat fir déi Belsch a Lëtzebuenger Partner aus den Ökosystemer vun den erneierbaren Energien, dem Waasserstoff, dem maritimme Secteur an der Banneschëfffaart zesummen ze bréngen, fir gemeinsame Projete Visibilitéit ze ginn an méiglech nei grenziwwerschreidend Projeten ungestoussen. D'Firma Jan De Nul huet hire Sëtz zanter 1996 zu Lëtzebuerg, wou ëm déi 600 Salariaer vum Betrib affiliéiert sinn, dorënner 494 Séifuerer. Jan de Nul ass spezialiséiert op maritim Baggeraarbechten („*dragage*“) an méi rezent weider Aktivitéite betreffen d'Energieproduktioun am Mier.

### **Ad 2)**

Am Kader vum Ekonomesche Forum vun der Staatsvisitt hunn de belsche Kinnek an de Groussherzog, zesumme mat de Finanzministere vu béide Länner, un engem Treffe mat Verrieder aus dem Finanzwiesen zu Bréissel deelgeholl. Am Mëttelpunkt vun dësem Treffe stoungen d'Wichtigkeet vum Finanzsecteur am allgemengen an a Bezuch op d'Finanzéierung vun der duebeler Transitioun, d'Promotioun vun oppene Mäert an dem fräien Handel, sou wéi och den oppene Bannemaart. D'Finanzinstituter, Associatiounen a Regulateuren, déi un dësem Treffen deelgeholl hunn, sinn: Delen Private Bank, BCEE, BNY Mellon, Belfius Bank, CAA, ALFI, Euroclear, LFF, FSMA, Banque de Luxembourg, Degroof Petercam AM, Febelfin, ACA, CSSF, LHoFT, LPEA, Euronext Bruxelles, Sopiad, Greenomy, Bourse de Luxembourg, Swift, Banque de Luxembourg Belgique, Fintech Belgium, ABBL, ABN Amro, Chambre de commerce Luxembourg, Banque Puilaetco Dewaay, Nagelmackers, Banque Transatlantique Belgique, BNP Paribas.

Am Kader vum Ekonomesche Forum zu Bréissel goufen et och Gespréicher mat Verrieder vu MyelinH/Imec.istart, Luxconnect/Proximus an OST Fenster/Chassis Henin.

De belsche Kinnek an de Groussherzog hunn och de Ghent Northsea Port an d'Anglo Belgian Corporation - ABC Engines zu Gent besicht

De Minister fir Wirtschaft, PME, Energie an Tourismus hat op der Staatsvisitt a sengem Programm doriwwe eraus Echangingen an Rencontere mat Creos, Fluxys, Hitec Luxembourg an AMOS.

Et waren insgesamt 129 Lëtzebuenger Betriber an der Lëtzebuenger Business Delegatioun déi vun der Chambre de Commerce encadréiert gouf an un der Staatsvisitt bedeelegt war. Et sinn och Echangë mat Vertrieder vun dese Betriber ginn.

**Ad 3)**

Mir verweisen op d'Äntwert op déi éischt Fro iwwert d'Grënn vum Besuch vun der Firma.

**Ad 4)**

De Formatiounscenter mat Simulatore fir Séifuerer, JDN Academy, gouf 2016 zu Lëtzebuerg gegrënnt, an e groussen Deel vun der Formatioun fir déi spezialiséiert Mataarbechter op de Baggerschëffer gëtt do organiséiert.

De Grupp Jan de Nul huet aktuell 72 Schëffer ënnert Lëtzebuenger Pavillon, dorënner 69 Draguen (Baggerschëffer) an 3 kleng autonom Unitéiten ouni Equipage. Jan de Nul ass den éischten Armateur, deen zu Lëtzebuerg esou eng autonom Unitéit umellt.

De Lëtzebuenger maritime Secteur soll sech a Richtung vum *Green Shipping* weider entwéckelen, dëst ass och eng Prioritéit vu Jan de Nul.

Lëtzebuerg, den 17. Mee 2024.

De Premierminister,

(s.) Luc FRIEDEN